

摘藻堂四庫全書薈要

集部

欽定四庫全書蒼要卷一萬八千一百八集部

御定全唐詩卷七百三

翁承贊

翁承贊字文堯

一作饒

閩人乾寧二年登進士第又擢宏

詞科任京兆府叅軍天祐元年以右拾遺受詔冊王審
知為王梁開平四年復為閩王冊禮副使尋擢諫議大
夫福建鹽鐵副使就加左散騎常侍御史大夫留相閩
卒詩一卷

晨興

晨起竹軒外逍遙清興多
早涼生戶牖孤月照關河
旅食甘藜藿歸心憶薜蘿
一尊如有地放意且狂歌

題菖潭安閩院

桃宗營祀舍幽異勝珠林
名士穿雲訪飛禽傍竹吟
窗含孤岫影牧卧斷霞陰
景福滋閩壤芳名亘古今

華下霽後曉眺

結茅幽寂近禪林
霽景煙光著柳陰
千嶂華山雲外秀

萬重鄉思望中深老嫌白髮還偷鑷貧對春風亦強吟
花畔水邊人不會騰騰閒步一披襟

喜弟承檢登科

兩篇佳句敵瓊瑰憐我三清道路開荆璞獻多還得售
桂堂恩在敢輕回花繁不怕尋香客榜到應傾賀喜杯
知爾苦心功業就早攜長策出山來

蒙閩王改賜鄉里

鄉名文秀里光賢別向釣台造化權閥閱便因今日貴

德音兼與後人傳自從受賜身無力向未酬恩骨肯鑄
歸闕路遙心更切不嫌扶病倚旌旃

訪建陽馬驛僧亞齊

蕭蕭風雨建陽溪溪畔維舟訪亞齊一軸新詩劍潭北
十年舊識華山西吟魂惜向江村老空性元知世路迷
應笑乘輶青瑣客此時無暇聽猿啼

題景祥院

一溪拖碧遶崔嵬瓶鉢偏宜向此隈農罷樹陰黃犢卧

齋時山下白衣來
松多徃日門人種
路是前朝釋子開
三卷貝多金粟語
可能心煉得成灰

寄舍弟承裕員外

江花岸草晚萋萋
公子王孫思合迷
無主園林饒採伐
忘情鷗鳥恣一作自高低
長江月上魚翻鬣
荒圃人稀獺印蹄
何事斜陽再回首
休愁離別峴一作雁山西

文明殿受冊封閩王

龍墀班聽漏聲長
竹帛昭勲撲御香
鳴珮洞庭辭帝主

登車故里冊閩王一千年改江山瑞十萬軍蒙雨露光
吟寄短篇追往事留文功業不尋常

御命歸鄉蒙賜錦衣

九重宣旨下丹墀面對天顏賜錦衣中使擎來三殿曉
寶箱開處五雲飛德音耳聆君恩重金印腰懸已力微
更待臨軒陳鼓吹星軺便指故鄉歸

奉使封閩王歸京洛

泥緘紫誥御恩光信馬嘶風出洛陽此去願言歸梓里

預憑魂夢展維桑客程回首瞻文陛驛路乘軺憶故鄉
指日還家堪自重恩榮畫錦賀封王

奉使封王次宜春驛

微官淹留鬢已斑此心長憶舊林泉不因列土封千乘
爭得銜恩拜二天雲斷自宜鄉樹出月高猶伴客心懸
夜來夢到南臺上徧看江山勝往年

甲子歲銜命到家至榕城冊封次日閩王降旌
旗於新豐市堤餞別

登庸樓上方停樂新市堤邊又舉杯正是離情傷遠別
忽聞台旨許重來此時暫與交親好今日還將簡冊回
爭得長房猶在世縮教地近釣魚臺

寄示兒孫

力學燒丹二十年辛勤方得遇真仙便隨羽客歸三島
旋聽霓裳適九天得路自能酬造化立身何必戀林泉
予家藥鼎分明在好把仙方次第傳

天祐元年以右拾遺使冊閩王而作

蓬萊宮闕曉光勻
紅案昇麻降紫宸
鸞奏八音諧律呂
鳳銜五色顯絲綸
蕭何相印鈞衡重
韓信齋壇雨露新
得侍丹墀官異寵
此身何幸沐恩頻

漢上登舟憶閩

漢皋亭畔起西風
半挂征帆立向東
久客自憐歸路近
算程不怕酒觴空
參差雁陣天初碧
零落漁家蓼欲紅
一片歸心隨去櫂
願言指日拜文翁

對雨述懷示弟承檢

淋淋霎霎結秋霖欲使秦城歎陸沈曉勢遮回朝客馬
夜聲滴破旅人心青苔重疊封顏巷白髮蕭疎引越吟
不有惠連同此景江南歸思幾般深

題壺山

井邑斜連北蓬瀛直倚東秋高巖溜白日上海波紅

題故居

一為鵝子二連花三望青湖四石斜惟有嶺湖居第五
山前却是宰臣家

題槐

雨中妝點望中黃
句引蟬聲送夕陽
憶昔當年隨計吏
馬蹄終日為君忙

擢進士

霓旌引上大羅天
別領新銜意自憐
蝴蝶流鶯莫先去
滿城春色屬羣仙

擢探花使三首

洪崖差遣探花來
檢點芳叢飲數杯
深紫濃香三百朶

明朝為我一時開

九重煙暖圻槐芽自是昇平好物華今日始知春氣味
長安虛過四年花

探花時節日偏長恬淡春風稱意忙每到黃昏醉歸去
紵衣惹得牡丹香

書齋謾興二首

池塘四五尺深水籬落兩三般樣花過客不須頻問姓
讀書聲裏是吾家

官事歸來衣雪埋
兒童燈火小茅齋
人家不必論貧富
惟有讀書聲最佳

辭閩王歸朝寄倪先輩

時人莫訝再還鄉
簡冊分明劔佩光
駟馬高車太常樂
登庸門下憶賢良

曉望

清霜散漫似輕嵐
玉闕參差萬象涵
獨上秦臺最高處
舊山依約在東南

萬壽寺牡丹

爛漫香風引貴遊
高僧移步亦遲留
可憐殿角長松色
不得王孫一舉頭

松

倚澗臨溪自屈蟠
雪花銷盡鮮花乾
幽枝好折為談柄
入手方知有歲寒

柳

斜拂中橋遠映樓
翠光駘蕩曉烟收
洛陽才子多情思

橫把金鞭約馬頭

高出營門遠出牆
朱闌門閉綠成行
將軍宴罷東風急
閒觀旌旗簇畫堂

彭澤先生酒滿船
五株栽向九江邊
長條細葉無窮盡
管領春風不計年

煬帝東遊意緒多
宮娃眉翠兩相和
一聲水調春風暮
千里交陰鎖汴河

纏繞春情卒未休
秦娥蕭史兩相求
玉句闌內朱簾捲

瑟瑟絲籠十二樓

隋堤柳

春半烟深汴水東
黃金絲軟不勝風
輕籠行殿迷天子
拋擲長安似夢中

句

烟蘿況逼神仙窟
丹竈還應許獨尋

贈黃璞見
福州志

御定全唐詩卷七百三

欽定四庫全書薈要卷一萬八千一百九集部

御定全唐詩卷七百四

黃滔

黃滔字文江莆田人昭宗乾寧二年擢進士第光化中除四門博士尋遷監察御史裏行充威武軍節度推官王審知據有全閩而終其身為節將者滔規正有力焉集十五卷今編詩三卷

送僧歸北巖寺

北巖泉石清本自高僧住新松五十年藤蘿成古樹題

詩昔佳士

洎表丈從叔有名於當時兼四門薛博士俱曾題詩

清風二林喻上智

失扣關多被浮名誤蓮局壓月澗空羨黃金布江翻島
嶼沈木落樓臺露伊余東還際每起烟霞暮旋為儉府
招未得窮野步西軒白雲閣師辭洞庭寓越城今送歸
心到焚香處

寓言

流年五十前朝朝倚少年流年五十後日日侵皓首非

通非介人誰論四十九賢哉
遽伯玉清風獨不朽

長安書事

終不離青山誰道雲無心
卻是白雲士有時出中林
昨日擎紫泥明日要黃金
炎夏羣木死北海驚波深
伏蒲無一言草疏賀德音

賈客

大舟有深利滄海無淺波
利深波也深君意竟如何
鯨鯢齒上路何如少經過

寄友人

君愛桃李花桃李花易飄
妾憐松柏色松柏色難凋
當年識君初指期非一朝
今辰見君意日暮何蕭條
入門有勢利孰能無囂囂

落花

落花辭高樹最是愁人處
一一旋成泥日暮有風雨不
如沙上蓬根斷隨長風飄然
與道俱無情任西東

寄徐正字夔

八月月如水登樓見姑射美人隔千里相思無羽駕紅
蘭裛露衰誰以一作似流光訝何當詩一句同吟祝玄化

秋夕貧居

聽歌桂席闌下馬槐煙裏豪門腐梁肉窮巷思糠粃孤
燈照獨吟半壁秋花死遲明亦如晦雞唱徒為爾

書懷寄友人

此生如孤燈素心挑易盡不及如頑石非與磨礮近常
思揚子雲五藏曾離身寂寞一生中千載空清芬

閨怨

妾家五嶺南君戍三城北雁來雖有書衡陽越不得別
久情易料豈在窺翰墨塞上無煙花寧思妾顏色

喜翁文堯員外病起

衛玠羊車懸長卿駟馬妾天嫌太端正神乃減風儀飲

冰俾消渴斷穀皆清羸越僧誇艾炷秦女隔花枝自能

論苦器

語見泗州和尚碑

不假求良醫驚殺漳濱鬼錯與劉生

隨昨日已如

一作成

虎今朝謁荀池揚鞭入王門四面人

熙熙青桂任霜霰尺璧無瑕疵迴塵却惆悵歸闕難遲
遲

寄鄭縣李侍御

古縣新煙火東西入客詩靜長如假

一作如
長暇

日貧更甚

閒時僧借松蘿住人將雨雪期三年一官罷嶽石看成
碑

工李補闕

十洲非暫別龍尾肯慵登諫草封山藥朝衣施衲僧月

留江客待句厯釣船徵終恐林棲去
餐霞葉上昇

送李山人往湘中

漢渚往湘川乘流入遠天
新秋無岸水明月有琴船
露坐應通曉萍居恐隔年
嶽峯千萬仞知上嘯猿巔

書崔少府居

一作贈
李補闕

魯史蜀琴旁陶然舉一觴
夕陽明島嶼秋水淺池塘
世亂憐官替家貧值歲荒
前峯亦曾宿知有辟寒方

敷水盧校書

九霄無詔下何事近清塵宅帶松蘿僻日唯猿鳥親吟
高僊掌月期有洞庭人莫問煙霞句懸知見嶽神

寄漢上友人

襄漢多清景東遊已不能蒹葭照流水風雨撲孤燈獻
賦聞新鴈思山見去僧知君北來日惆悵亦難勝

貽林鐸

終被春闈屈低回至白頭寄家僧許嶽釣浦雨移洲戰
士曾憐善豪門不信愁王孫草還綠何處擬羈遊

書懷

退耕逢歎歲，逐貢愧行朝。
道在愁雖淺，吟勞髮欲凋。
破村虹入井，孤館客投魍。
誰怕秋風起，聽蟬度渭橋。

送陳明府歸衡陽

鷓鴣兼留一作下單車，出柳煙。
三年兩殊考，一日數離

筵。久別湖波綠，相思嶽月圓。
翠羅曾隱處，定恐卻求仙。

秋辭江南

灞陵橋上路，難負一年期。
積雨鴻來夜，重江客去時。
勞

生多故疾漸老少新知惆悵都堂內無門雪滯遺
入關旅次言懷

寸心唯自切上國與誰期月晦時風雨秋深日別離便
休終未肯已苦不能疑獨媿商山路千年四皓祠

貽李山人

野步愛江濱江僧得見頻新文無古集往事有清塵松
竹寒時雨池塘勝處春定應雲雨內陶謝是前身

寄邊上從事

斜日下孤城長吟出點兵羽書和客卷邊思雜詩情朔
雪定鴻翼西風嚴角聲吟餘多獨坐沙月對樓生

題東林寺元祐上人院

廬阜東林寺良遊耻未曾半生隨計吏一日對禪僧泉
遠攜茶看峰高結伴登迷津出門是子細問三乘

送陳樵下第東歸

青山烹茗石滄海寄家船雖得重吟歷終難任意眠碓
疎連寺柳風爽徹城泉送目紅蕉外來期已杳然

寄陳磻隱居

道經前輩許名拔後時喧虛左中興榜無先北海尊新
文漢氏史別墅謝公村須到三徵處堂堂謁帝閣

寄林寬

相知四十年故國與長安俱喜今辰在休論往歲難海
鳴秋日黑山直夏風寒終始前儒道升沈盡一般

退居

老歸江上村孤寂欲何言世亂時人物家貧後子孫青

山寒帶雨古木夜啼猿惆悵西川舉戎裝度劍門

送友人邊遊

銜杯國門外分手見殘陽何日還南越今朝往北荒砂
城經雨壞虜騎入秋狂親一作新詠關山月歸吟鬢的霜

下第出京

還失禮官求花時出雍州一生為遠客幾處未曾遊故
疾江南雨單衣薊北秋茫茫數年事今日淚俱流

遊東林寺

平生愛山水下馬虎溪時已到終嫌晚重遊預作期寺
寒三伏雨松偃數朝杖翻譯如曾見白蓮開舊池

贈懷光上人

謝城還擁入師以接人勞過午休齋慣離經吐論高頂
寒峯素髮珠銳走紅條終憶泉山寺聽猿看海濤

憶廬山舊遊

前年入廬嶽數宿在靈溪殘燭松堂掩孤峯月狖啼平
生為客老勝境失雲棲縱有重遊日煙霞會恐迷

別友人

莫恨東牆下頻傷命不通苦心如有感他日自推公
雨夜扁舟發花時別酒空越山煙翠在終媿卧雲翁

陳侍御新居

幕客開新第詞人遍有詩山憐九仙近石買太湖奇
樹勢想高日地形誇得時自然成避俗休與白雲期

寄從兄璞

縱徵終不起相與避煙塵待到中興日同看上國春
新

詩說人盡舊宅落花頻移覓深山住啼猿作四鄰

寄李校書遊簡寂觀

古觀雲溪上孤懷永夜中
梧桐四更雨山水一庭風
詩得如何句仙遊最勝宮
卻愁逢羽客相與入煙空

寄友人山居

斷嶠滄江上相思恨阻尋
高齋秋不掩幾夜月當吟
落石有泉滴盈庭無樹陰
茫茫名利內何以拂塵襟

上一作刑部盧員外

寄

誰識在官意開門樹色間尋幽頻宿寺乞假擬歸山半
白侵吟鬢微紅見藥顏不知琴月夜

一作今夜月

幾客得同

閒

送友人遊邊

虜酒不能濃縱傾愁亦重關河初落日霜雪下窮冬野
燒枯蓬旋沙風仄馬衝薊門無易過

一作野漢土

千里斷人

蹤

一作遊子莫從容

和友人酬寄

新發煙霞詠高人得以傳吟銷松際雨冷咽石間泉大
國兵戈日故鄉饑饉年相逢江海上寧免一潛然

下第

昨夜孤燈下闌干泣數行辭家從早歲落第在初場青
草湖田改單車客路忙何人立功業新命到封王

過商山

燕鴈一來後人人盡到關如何衝臘雪獨自過商山羸
馬高坡下哀猿絕壁間此心無處說鬢向少年斑

旅懷

蕭颯聞風葉驚時不自堪
宦名中夜切人事長年諳古
畫僧留與新知客遇談鄉心隨去鴈
一一到江南

冬暮山舍喜標上人見訪

寂寞三冬杪深居業盡拋
逕松開雪後砌竹忽僧敲
茗汲冰銷溜鑪燒鵲去巢
共談慵僻意微日下林梢

關中言懷

三秦五嶺意不得不依然
跡寓枯槐曲業蕪芳草川花

當落第眼雨暗出城天層閣浮雲外何人動管絃

題友人山居

到君棲跡所竹逕與衡門亦在乾坤內獨無塵俗喧
新泉浮石蘚崩壁露松根更說尋僧處孤峯上嘯猿

寄敷水盧校書

諫省垂清論仙曹豈久臨雖專良史業未畏直臣心
路入丹霄近家藏華嶽深還如韓吏部誰不望知音

贈明州霍員外

惠化如施雨鄰州亦可依正衙無吏近高會覺人稀海
日旗邊出沙禽角外歸四明多隱客閑約到巖扉

題友人山齋

疎竹漏斜暉庭間陰復遺句成苔石茗吟弄雪窗碁沙
草泉經澀林齋客集遲西風虛見逼未擬問京師

書事

望歲心空切耕夫盡把弓千家數人在一稅十年空沒
陣風沙黑燒城水陸紅飛章奏西蜀明詔與殊功

題山居逸人

十畝餘蘆葦新秋看雪霜世人誰到此塵念自應忘斜
日風收釣深秋雨信梁不知雙闕下何以謂軒裳

題鄭山人居

履迹遍莓苔幽枝間藥栽枯杉擎雪朶破牖觸風開泉
自孤峯落人從諸洞來終期宿清夜斟酌說天台

秋晚山居

爽氣遍搜空難堪倚望中孤煙愁落日高木病西風山

寂樵聲出露涼蟬思窮此時塵外事幽默幾人同

遊山

洞門穿瀑布塵世豈能通曾有遊山客來逢採藥翁異
花尋復失幽徑躡還窮擬作經宵計風雷立滿空

題王侍御宅內亭子

俗間塵外境郭內宅中亭或有人家創還無蓮幕馨石
曾湖岸見琴誤嶽樓聽來客頻頻說終須作畫屏

題道成上人院

花宮城郭內師住亦清涼何必天台寺幽禪瀑布房
簾舒湘竹滑茗煮蜀芽香更看道高處君侯題翠梁

貧居冬杪

數塞未求通吾非學養蒙窮居歲杪雨孤坐夜深風
年長慙昭代才微辱至公還愁把春酒雙淚污杯中

貽張蟪

一本題下有
同年二字

夢思非一日攜手却淒涼詩見江南電遊經塞北霜
驅車先五漏把菊後重陽惆悵天邊桂誰教歲歲香

晚春關中

忍歷通莊出東風舞酒旗
百花無看處三月到殘時
遊塞聞兵起還吳值歲饑
定唯荒寺裏坐與噪蟬期

河梁

五原人走馬昨夜到京師
繡戶新夫婦河梁生別離
隴花開不艷羌笛靜猶悲
惆悵良哉輔鏘鏘立鳳池

送翁拾遺

還家俄

一作還

赴闕別思肯淒淒
山坐輶車看詩持

一作將

諫筆題天開中國大地設四維
低拜舞吾君後青雲更有梯

逢友人

彼此若飄蓬二年何所從
帝都秋未入江館夜相逢
瘴嶺行衝夏邊沙住隔冬
旅愁論未盡古寺扣晨鐘

寄湘中鄭明府

縣與白雲連滄州況縣前
嶽僧同夜坐江月看秋圓
琴拂莎庭石茶擔乳洞泉
莫眈雲水興疲俗待君痊

寄少常盧同年

官拜少常休青綬換鹿裘狂歌離樂府醉夢到瀛洲古
器巖耕得神方客謎留清溪莫沈釣王者或改遊

傷翁外甥

江頭去時路歸客幾紛紛獨在異鄉歿若為慈母聞青
春成大夜新雨壞孤墳應作芝蘭出泉臺月桂分


東山之遊未遂漸逼行期作四十字奉寄翁文
堯員外

輶車難久駐須到別離時
北闕定歸去東山空作期
綠苔勞掃徑丹鳳欲銜詞
揚柳開帆岸今朝淚已垂

御定全唐詩卷七百四

謹案卷七百二第六頁後二行蠻藤絲酒瓢刊本

瓢訛飄據別本改



總校官庶吉士臣張能照

校對官庶吉士臣許兆椿

謄錄監生臣李憲滋

欽定四庫全書薈要

集部

御定全唐詩卷七百

五至
七

詳校官原任事臣李斯咏

欽定四庫全書薈要卷一萬八千一百十

集部

御定全唐詩卷七百五

黃滔

送林寬下第東歸

離東
君
惆悵惜離京
年少無人有屈名
積雪未開移發日

鳴蟬初急說來程
楚天去路過飛鴈
灞岸歸塵觸鎖城
又得新詩幾章別
煙村竹迳海濤聲

商山贈隱者

誰不相逢話息機
九重城裏自依依
蓬萊水淺有人說
商洛山高無客歸
數隻珍禽寒月在
千株古木熟時稀
西窓昨夜鳴蛩盡
知夢芝翁起扣扉

送二友遊湘中

千里楚江新雨晴
同征肯恨迹如萍
孤舟泊處聯詩句
八月中旬宿洞庭
為客早悲煙草綠
移家晚失嶽峯青
今來無計相從去
歸日汀洲乞畫屏

塞下

尺馬蕭蕭去不前
平蕪千里見窮邊
關山色死秋深

一作

深秋日鼓角聲沈
霜重天荒骨或銜
殘鐵露驚風時掠
暮

沙旋隴頭
冤氣無歸處
化作陰雲飛杳然

下第東歸留辭刑部鄭郎中誠

去違知己住違親
欲發羸蹄進退頻
萬里家山歸養志
數年門館受恩身
鶯聲歷歷秦城曉
柳色依依灞水春
明日藍田關外路
連天風雨一行人

寄懷南北故人

秋風昨夜落芙蓉一片離心到外區
南海浪高書墮水北州城破客降胡
玉窗桃鳳佳人老綺陌啼鶯碧樹枯
嶺上青嵐隴頭月時通魂夢出來無

關中言懷

事事朝朝委一尊自知無復解趨奔
試期交後猶為客公道開時敢說冤
窮巷往來經積雨故山歸去見荒村
舉頭盡到斷腸處何必秋風江上猿

閨怨

寸心杳與馬蹄隨如蛻形容在錦帷江上月明船發後
花間日暮信迴時五陵夜作酬恩計四塞秋為破虜期
待到乘輅入門處淚珠流盡玉顏衰

旅懷

未啣金丹看十洲乃將身世作仇讎
羈遊數地值兵亂宿在孤城聞雨秋
東越雲山卻思隱西秦霜霰苦頻留
他人折盡月中桂惆悵當年江上鷗

別友人

已喜相逢又怨嗟十年飄泊在京華
大朝多事還停舉故國經荒未有家
鳥帶夕陽投遠樹人衝臘雪徃邊沙
夢魂空繫瀟湘岸煙水茫茫蘆葦花

寄羅浮山道者二首

天際雙山壓海濱天漫絕頂海漫根
時聞雷雨驚樵客長有龍蛇護洞門
泉石暮含朱槿晝煙霞冬閉木綿溫
林間學道如容我今便辭化寵辱喧

有人曾見洞中仙纔到

一作見

人間便越年金鼎藥成龍

入海玉函書發鶴歸天樓開石脉千尋直山拆鼈鱗一
半臙誰到月明朝禮處翠巖深鎖荔枝煙

喜侯舍人蜀中新命三首

八都詞客漫喧然誰解飛揚誥誓間五色綵毫裁鳳詔
九重天子謫龍顏巴山月在趨朝去錦水煙生入閣還
謀及中興多少事莫愁明月不收關

却搜文學起吾唐暫失都城亦未妨錦里幸為丹鳳闕
幕賓徵出紫微郎來時走馬隨中使到日援毫定外方

若以掌言看諫獵相如從此病

一作

輝光

賈誼纔承宣室召左思唯預秘書流賦家達者無過此
翰苑今朝是獨遊立被御爐煙氣逼吟經棧閣雨聲秋
內人未識江淹筆竟問當時不早求

經安州感故鄭郎中二首

雲夢江頭見故城人間四十載垂名馬蹄踐處東風急
雞舌銷時北闕驚嶽客出來尋古劍野猿相聚叫孤塋
騰身飛上鳳凰閣惆悵終乖吾黨情

錦帳光生作牧州，干戈缺後見荒丘。
兼無姓賈兒童在，空有還珠煙水流。
江句行人吟刻石，月腸是處象登樓。
旅魂頻此歸來否，千載雲山屬一遊。

出京別崔學士

一從門館遍投文，旋忝恩知驟出羣。
不道鶴雞殊羽翼，許依龍虎借風雲。
命竒未便乘東律，言重終期雪北軍。
欲逐飄蓬向岐路，數宵垂淚戀清芬。

鴈

楚岸花晴塞柳衰年年南北去來期江城日暮見飛處
旅館月明聞過時萬里風霜休更恨滿川煙草且須疑
洞庭雲水瀟湘雨好把寒更一一知

寄越從事林嵩侍御

子虛詞賦動君王誰不期君入對敬莫戀兔園留看雪
已乘驄馬合凌霜路歸天上行方別道在人間久便香
應念都城舊吟客十年蹤跡委滄浪

長安書事

一年年課數千言口祝心祠挈出門孤進難時誰肯薦
主司通處不須論頻秋入自邊城雪昨日聽來嶺樹猿
若有水田過十畝早應歸去狄江村

旅懷寄友人

重疊愁腸只自知苦於吞蘂亂於絲一船風雨分襟處
千里煙波回首時故國田園經戰後窮荒日月逼秋期
鳴蟬似會悠揚意陌上聲聲怨柳衰

寄蔣先輩

在蘇州

夫差宮苑悉蒼苔攜客朝遊夜未回塚上題詩蘇小見

許殿切

江頭酌酒伍員來秋風急處煙花落明月中時水

寺開千載三吳有高跡虎丘山翠益崔嵬

旅懷

雪貌潛凋雪髮生故園魂斷弟兼兄十年除夜在孤館
萬里一身求大名空有新詩高華嶽已無丹懇出秦城
侯門莫問曾遊處槐柳影中肝膽傾

放榜日

吾唐取士最堪誇，仙榜標名出曙霞。
白馬嘶風三十轡，朱門秉燭一千家。
郊誥聯臂昇天路，宣聖飛章奏日華。
其年當日奏試歲歲人人來不得，曲江煙水杏園花。

二月二日宴中貽同年封先輩渭

帝堯城裏日銜杯，每倚嵇康到玉顏。
桂苑五更聽榜後，蓬山二月看花開。
垂名入甲成龍去，列姓如丁作鶴來。
同戴大恩何處報，永言交道契陳雷。

新野道中

野堂如雪草如茵光武城邊一水濱越客歸遙春有雨
杜鵑啼苦夜無人東堂歲去銜杯嬾南浦期來落淚頻
莫道還家不惆悵蘇秦羈旅長卿貧

酬俞鈞

鄉書一忝薦延恩二紀三朝泣省門雖忝立名經聖鑒
敢期典詠壘嘉言莫論蟾月無梯接大底龍津有浪翻
今日朝廷推草澤佇君承詔出雲根

寄同年崔學士

半因同醉杏花園塵忝鴻鑪與鑄顏已脫素衣酬素髮
敢持青桂愛青山雖知珠樹懸天上終賴銀河接世間
畢使海涯能拔宅三秦二十四畿寰

御試二首

昭宗乾寧二年崔凝考定進士張貽
憲等二十五人復命所司覆試內出

四題乃曲直不相入賦良弓獻問賦詢於芻蕘
詩品物咸熙詩趙觀文程晏崔賞崔仁實等四
人并盧瞻韋說封涓韋希震張蟻黃滔盧鼎王
貞白沈崧陳曉李龜祜等十一人並與及第其
張貽憲孫溥李光序李樞李途等五人且今落
下許後再舉其崔礪蘇楷杜承昭鄭稼等四人
不令再舉內一人盧廢稱疾不至宣令昇入又
云華陰省親其父渥進狀乞落下故就試止二

十四
人也

已表隋珠各自攜更從瓊殿立丹梯九華燈作三條燭
萬乘君懸四首題靈鳳敢期翻雪羽洞簫應或諷金闈
明朝莫惜場場醉青桂新香有紫泥

六曹三省列簪裾丹詔宣來試士初不是玉皇疑羽客
要教金榜帶天書詞臣假寐題黃絹宮女敲銅奏子虛
御目四篇酬九百敢從燈下畧躊躇

寄陳侍御

千年二相未全誇

故劉相趙相
曾從事閩中

猶闕閩城賀降麻何必

錦衣須太守別無蓮幕勝王家醴泉湧處休論水黃菊
開時獨是花九級燕金滿尊酒卻愁隨詔謁承華

酬徐正字黃

已免蹉跎負歲華敢辭霜鬢雪呈花名從兩榜考昇第
官自三台追起家疋馬有期歸輦轂故山無計戀桑麻
莫言蓬閣從容久披處終知金在砂

辭相府

時蒙堂帖
追赴闕

從漢至唐分五州誰為將相作諸侯閩江似鏡正堪戀
秦容如蓬難久留足馬忍辭藩屏去小才寧副廟堂求
今朝拜別幡幢下雙淚如珠滴不休

寄羅郎中隱

休向中興雪至冤錢塘江上看濤翻三徵不起時賢議
九轉終成道者言綠酒千杯腸已爛新詩數首骨猶存
瑤蟾若使知人事仙桂應遭蠹卻根

江行遇王侍御

數年分散秦吳隔，暫泊官船浦柳中。
新草軍書名更重，久辭山逕業應空。
渡頭潮落將行客，天際風高未宿鴻。
此日相逢魂合斷，賴君身事漸飛冲。

客舍秋晚夜懷故山

寥寥深巷客中居，況值窮秋百事疎。
孤枕憶山千里外，破窗聞雨五更初。
經年荒草侵幽逕，幾樹西風鎖弊廬。
長繫寸心歸未得，起挑殘燭獨躊躇。

絳州鄭尚書

旌旗日日展東風雲稼連山雪刃空剖竹已知垂鳳食
摘珠何必到龍宮諫垣虛位期飛步翰苑含毫待紀公
誰謂唐城諸父老今時得見蜀文翁

喜陳先輩及第

嶠

今年春已到京華天與吾曹雪怨嗟甲乙中時公道復
朝廷看處主司誇飛離海浪從燒尾燕卻金丹定易牙
不是駕前偏落羽錦城爭得杏園花

延福里居和林寬何紹餘酌寄

長說愁吟逆旅中，一庭深雪一窗風。
眼前道路無心覓，象外煙霞有句通。
幾度相留侵鼓散，頻聞會宿著僧同。
高情未以干時廢，屬和因知興不窮。

贈宿松揚明府

溪上家家禮樂新，始知為政異常倫。
若非似水清無底，爭得如冰凜拂人。
月狖聲和琴調咽，煙村景接柳條春。
宦遊兼得逍遙趣，休憶三吳舊釣津。

送僧

纔年七歲便從師猶說辭家學佛遲新斲松蘿還不住
愛尋雲水擬何之孤溪雪滿維舟夜疊嶂猿啼過寺時
鳥道龍湫悉行後豈將翻譯負心期

贈鄭明府

庭羅衙吏眼看山真恐風流是謫仙垂柳五株春婬姸
鳴琴一弄水潺湲援毫斷獄登殊考駐樂題詩得出聯
莫起陶潛折腰歎才高位下始稱賢

江州夜宴獻陳員外

多少歡娛簇眼前
潯陽江上夜開筵
數枝紅蠟啼香淚
兩面青娥拆瑞蓮
清管徹時斟玉醕
碧籌回處擲金船
因知徃歲樓中月
占得風流是偶然

湘中贈張逸人

羽衣零落帽歌斜
不自孤峯即海沙
曾為蜀山成寓跡
又因湘水擬營家
鳴琴坐見燕鴻沒
曳履吟忘野迳賒
更愛扁舟宿寒夜
獨聽風雨過蘆花

寓題

紛紛墨勅除官日處處紅旗打賊時竿底得璜猶未用
夢中吞鳥擬何為損生莫若攀丹桂免俗無過詠紫芝
兩岸蘆花一江水依前且把釣魚絲

題陳山人居

猶自莓苔馬跡重石嵌泉冷嬾移峯空垂鳳食簷前竹
漫拔龍形澗底松隔岸青山秋見寺半牀明月夜聞鐘
誰能惆悵磻溪事今古悠悠不再逢

宿李少府園林

一壺濁酒百家詩，住此園林守選期。
深院月涼留客夜，一作夜客古杉風細似泉時。
嘗頻異茗塵心淨，議罷名山竹影移。
明日綠苔渾掃後，石庭吟坐復容誰。

送人明經及第東歸

十問九通離義牀，今時登第信非常。
亦從南院看新榜，旋束春關歸故鄉。
水到吳門方見海，樹侵闕嶺漸無霜。
知君已塞平生願，日與交親醉幾場。

斷酒

未老先為百病仍，醉杯無計接賓朋。
免遭拽盞郎君詭，還被簪花錄事憎。
絲管合時思索馬，池塘晴後獨留僧。
何因澆得離腸爛，南浦東門恨不勝。

南海幕和段先輩送韋侍御赴闕

樹色川光入暮秋，使車西發不勝愁。
壁連標格驚分散，雪課篇章互唱酬。
魏闕別當飛羽翼，燕臺獨且占風流。
滿園歌管涼宵月，此後相思幾上樓。

寄南海黃尚書

五羊城下駐行車，此事如今八載餘。
燕頷已知飛食肉，龍門猶自退為魚。
紅樓入夜笙歌合，白社驚秋草木疎。
西望清光寄消息，萬重煙水一封書。

送人往蘇州覲其兄

闔閭城外越江頭，兩地煙濤一葉舟。
到日荆枝應便茂，別時珠淚不須流。
迎歡酒醒山當枕，詠古詩成月在樓。
明日尊前若相問，為言今訪赤松遊。

遊東林寺

長生猶自重無生言讓仙祠佛寺成碑折誰忘康樂制
山靈表得遠公名松形入漢藤蘿短僧語離經耳目清
莫怪遲遲不歸去童年已夢遶林行

贈旌德呂明府

渥洼步數太阿姿爭遣王侯不奉知花作城池入官處
錦隨刀尺少年時兩衙斷獄兼留客三考論功合樹碑
須信隔簷看刺史錦章朱紱已葳蕤

賀清源僕射新命

雖言嵩嶽秀崔嵬少降連枝命世才南史兩榮唯百揆

東閩雙拜有三台

南史袁憲兄弟同為僕射當時榮之殊未若今清源與府城並拜僕射兼

帶台席

之尊二天在頂家家詠丹鳳銜書歲歲來虛說古賢

龍虎盛誰攀荆樹上金臺

浙幕李端公泛建溪

越城吳國結良姻交發芙蓉幕內賓自顧幽沈槐省跡
得陪清顯諫垣臣分題曉並蘭舟遠對坐宵聽月狖頻
更愛延平津上過一雙神劍是龍鱗

貽宋評事

河陽城裏謝城中，入曳長裾出佩銅。
燕國金臺無別客，陶家柳下有清風。
數蹤篆隸書新得，一竈屯蒙火細紅。
時說三吳欲歸處，綠波洲渚紫蒲藂。

催妝

北府迎塵南郡來，莫將芳意更遲回。
雖言天上光陰別，且被人間更漏催。
煙樹迥垂連蒂杏，綵童交捧合歡杯。
吹簫不是神仙曲，爭引秦娥下鳳臺。

寓題

每憶家山即涕零，定須歸老舊雲扃。
銀河水到人間濁，丹桂枝垂月裏馨。
霜雪不飛無翠竹，鯨鯢猶在有青萍。
三千九萬平生事，却恨南華說北溟。

傷蔣校書德山

誰到雙溪溪岸傍，與招魂魄上蒼蒼。
世間無樹勝青桂，隴上有花唯白楊。
秦苑火然新賦在，越城山秀故居荒。
如何萬古雕龍手，獨是相如識漢皇。

寄楊贊圖學士

學士與元昆俱以龍腦登選

東堂第一領春風時怪關西小驥慵華表柱頭還有鶴
華歆名下別無龍君恩鳳閣含毫數詩景珠宮列肆供
今日江南駐舟處莫言歸計為雲峯

酬楊學士

神仙簿上愧非夫詔作疑丹兩入爐詩裏幾曾吟芍藥
花中方得見菖蒲陽春唱後應無曲明月圓來別是珠
莫下蓬山不回首東風猶待重搏扶

寄同年李侍郎龜正

石門南面淚浪浪自此東西失帝鄉
崑璞要疑方卓絕大鵬須息始開張
已歸天上趨雙闕忽喜人間捧八行
莫道秋霜不滋物菊花還借後時黃

鍾陵故人

滕王閣下昔相逢此地今難訪
所從唯愛金籠貯鸚鵡誰論鐵柱鎖蛟龍
荆榛翠是錢神染河嶽期須國士鍾
一筋鱸魚千古美後人終少繼前蹤

故山

支頤默省舊林泉
石徑茅堂到目前
衰碧鳴蛩莎有露
濃陰歇鹿竹無煙
水從井底通滄海
山在窓中倚遠天
何事蒼髯不歸去
燕昭臺上一年年

塞上

塞門關外日光微
角怨單于鴈駐飛
衝水路從冰解斷
踰城人到月明歸
燕山臘雪銷金甲
秦苑秋風脆錦衣
欲弔昭君倍惆悵
漢家甥舅竟相違

烏石村

即林希
劉故居

往日江村今物華
一迴登覽一悲嗟
故人歿後城頭月
新鳥啼來壠上花
賣劍錢銷知絕俗
聞蟬詩苦即思家
謝公古郡青山在
三尺孤墳撲海沙

寄同年盧員外

聽盡鶯聲出雍州
秦吳煙月十經秋
龍門在地從人上
郎省連天須鶴遊
休戀一臺惟一作推
妙絕已經三字入
精求當年甲乙皆
華顯應念槐宮今雪頭

寄同年封舍人渭

時得來書

唐城接軫赴秦川
憂合懽離驟十年
龍領摘珠同泳海
鳳銜輝翰別升天
八行真跡雖收拾
四戶高扃奈隔懸
能使丘門終始雪
莫教華髮獨潸然

遇羅員外家

灞陵橋外駐征轅
此一分飛十六年
豸角戴時垂素髮
雞香含處隔青天
綺園難貯林棲意
班馬須持筆削權
可忘自初相識地
秋風明月客廊延

送翁員外承贊

誰言吾黨命多奇，榮美如君歷數稀。
衣錦還鄉翻是客，迴車謁帝卻為歸。
鳳旋北闕虛丹穴，星復南宮逼紫微。
已分十旬無急詔，天涯相送只沾衣。

奉和翁文堯十九員外中謝日蒙恩賜金紫之
什

面蒙君賜自龍墀，誰是還鄉一襲衣。
三品易懸鱗鬣赫，八絲展起綵章飛。
負為勝事垂千古，題作新詩啟七微。

嚴助買臣精魄在定應羞著

廷畧反

昔年歸

翁文堯員外捧金紫還鄉之命雅發篇章將原
交情遠為嘉貺泊燕鴻陸犬楚水荆山又吐瓊
瑤連之幽鄙雖湧泉思觸逸興皆虛而強韻押
難非才頗媿輒茲酬和以質獎私

搏將盛事更無餘還向橋邊看舊書東越獨推生竹箭
北溟喜足貯鯤魚兩迴誰解歸華表午夜兼能薦子虛

滔前年蒙文堯員外
以長牋薦於時相

須把頭冠彈盡日憐君不與故人

疎

奉和翁文堯員外經過七林書堂見寄之什

朱旗引入昔茆堂
半日從容盡日忙
駟馬寶車行錫禮
金章紫綬帶天香
山從南國添煙翠
龍起東溟認夜光
定恐故園留不住
竹風松韻漫淒鏘

奉酬翁文堯員外駐南臺見寄之什

人指南臺山與川
大驚喜氣異當年
花迎金冊非時拆
月對瓊杯此夜圓
我愛藏冰從夏結
君憐修竹到冬鮮

殷勤更抱鳴琴撫為憶秦兒識斷絃

翁文堯員外擁冊禮之歸一路有詩名畫錦集
先將寄示因書五十六字

六窠只佩諸侯印爭比從天擁冊歸一軸郢人歌處雪
兩重朱氏著來衣閩山秀已鍾君盡洛水波應濺我稀
明日陪塵迎駟馬定淮齋沐看光輝

奉和翁文堯員外文秀光賢畫錦之什

鄉名里號一朝新乃覺台恩重萬鈞建水閩山無故事

長卿嚴助是前身
清泉引入旁添潤
嘉樹移來別帶春
莫凭欄干剝留駐
內庭虛位待才臣

文秀
亭

雖言閩越繫生賢
誰是還家寵自天
山簡媿兼諸郡命
鄭玄慙秉六經權
鳥行去沒孤烟樹
漁唱還從碧島川
休說遲迴未能去
夜來新夢禁中泉

光賢
閩

君王面賜紫還鄉
金紫中推是甲裳
華構便將垂美號
故山重更發清光
水澄此日蘭宮鏡
樹憶當年栢署霜
珍重朱欄兼翠拱
來來皆自讀書堂

晝錦
堂

奉酬翁文堯員外神泉之遊見寄嘉什

含雞假豸喜同遊
野外嘶風並紫駟
松竹迴尋青障寺
姓名題向白雲樓
泉源出石清消暑
僧語離經妙破愁
爭奈愛山尤戀闕
古來能有幾人休

輒吟七言四韻寄翁文堯拾遺

唐設高科表用文
吾曹誰作諫垣臣
甄山秀氣曠千古
鳳闕華恩鍾二人
起草便論天上事
如君不是世間身
龍頭龍尾前年夢
今日須憐應若神

治卯年冬在宛陵
夢文堯作狀頭乃

第又中四月十二夜在清源夢到殿前
東道自西厲聲唱翁某拜右省拾遺

御定全唐詩卷七百五

欽定四庫全書蒼要卷一萬八千一百十一

其部

御定全唐詩卷七百六

黃滔

塞上

掘地破重城燒山搜伏兵
金徽互鳴咽玉笛自淒清
使發西都聳塵空北嶽橫
長河涉有路曠野宿無程
沙雨黃鶯轉轅門青草生
馬歸秦苑牧人在虜雲耕
落日牛羊聚秋風鼓角鳴
如何漢天子青塚杳含情

寄獻梓潼山侯侍御

時常珍
遠諫諍

漢宮行廟畧簪笏落民間直道三湘水高情四皓山
賜衣僧脫去奏表主批還地得松蘿塢泉通雨雪灣東門
添故事南省缺新班有新命
不起片石秋從露幽窓夜不關
夢餘蟾隱映吟次鳥綿蠻可惜相如作當時事悉閒

壬癸歲書情

故園招隱客應便笑無成謁帝逢移國投文值用兵孤
松憐鶴在疎柳惡蟬鳴疋馬迷歸處青雲失曩情江頭

寒夜宿壠上歎年耕冠蓋新人物漁樵舊弟兄
易生唯白髮難立是浮名惆悵灞橋路秋風誰入行

河南府試秋夕聞新鴈

湘南飛去日薊北乍驚秋叫出隴雲夜聞為客子愁
一聲初觸夢半白已侵頭旅館移歌枕江城起倚樓
餘燈依古壁片月下滄洲寂聽良宵徹躊躇感歲流

省試奉詔漲曲江池

以春字為韻
時乾符二年

地脉寒來淺恩波在後新引將諸派水別貯大都春
幽

咽疏通處清泠迸入辰漸平連杏岸旋濶映樓津沙沒
迷行徑洲寬恣躍鱗願當舟楫便一附濟川人

題宣一僧正院

五級凌虛塔三生落髮師都僧須有託孤嶠遂無期井
邑焚香待君侯減俸資山衣隨壘破萊骨逐年羸茶取
寒泉試松於遠澗移吾曹來頂手不合不題詩

和吳學士對春雪獻韋令公次韻

春雪下盈空翻疑臘未窮連天寧認月墮地屢兼風忽

誤邊沙上應平火嶺中林間妨走獸雲際落飛鴻梁苑
還吟客齊都省創宮掩扉皆堦北移律愧居東書幌飄
全濕茶鐺入旋融奔川半留滯疊樹互玲瓏出戶行瑤
砌開園見粉叢高才興詠處真宰荅殊功

省試一一吹竽

乾符
二年

齊竽今歷試真偽不難知欲使聲聲別須令箇箇吹後
先無錯雜能否立參差次第教單進宮商乃異宜凡音
皆竄跡至藝始呈奇以此論大學終憑一一窺

明月照高樓

月滿長空朗樓侵碧落橫波文流藻井桂魄拂雕楹深
鑒羅紈薄寒搜戶牖清冰鋪梁燕唳霜覆瓦松傾卓午
收全影斜懸轉半明佳人當此夕多少別離情

廣州試越臺懷古

南越千年事興懷一旦來歌鐘非舊俗煙月有層臺北
望人何在東流水不回吹窓風雜瘴沾檻雨經梅壯氣
曾難揖空名信可哀不堪登覽處花落與花開

襄州試白雲歸帝鄉

杳杳復霏霏，應緣有所依。
不言天路遠，終望帝鄉歸。
高嶽和霜過，遙關帶月飛。
斬憐雙闕近，寧恨衆山違。
陣觸銀河亂，光連粉署微。
旅人隨計日，自笑比麻衣。

省試內出白鹿宣示百官

乾寧二年

上瑞何曾乏，毛羣表色難。
推於五靈少，宣示百寮觀。
彤奪場駒潔，光交月兔寒。
已馴瑤草別，孤立雪花團。
戴豸慙端士，抽毫躍史官。
貴臣歌詠日，皆作白麟看。

出關言懷

又乞書題出關西謁列侯寄家僧許獄釣浦雨移洲賣
馬登長陸沾衣逐勝遊菜腸終日餒霜鬢度年秋詩苦
無人愛言公是世仇却憐庭際草中有號忘憂

壺公山

古老相傳古仙姓陳名壺
公於此山成道因而名焉

八面峯巒秀孤高可偶然數人遊頂上滄海見東邊不
信無靈洞相傳有古仙摘如珠一作木夏在池象月垂穿

山頭有池而圓兼
摘樹朱實夏在

髣髴嘗聞樂宕堯半插天山寒徹三

伏松偃出千年樵牧時
迷所倉箱歲壘川巖祠
風雨管怪木薜蘿纏
青草方中藥蒼苔石裏
錢瓊津流乳竇春

色駐芝田烏兔中
時近龍蛇蟄處臙嘉名
光列土秀氣產羣賢
瀑鑱瑤臺路溪舁釣浦
船鼇頭擎恐沒地軸壓

應旋蠲疾寒甘露藏珍
起瑞煙畫工飛夢寐詩
客寄林泉掘地多雲母
緣霜欠木綿井通鱖吐
脉僧隔虎棲禪

山間有井通海盈縮之
候貞元中有僧號法通
成通中有僧號弘播於
其絕頂獨禪昏行至降
虎而法通曾下山過兩
虎爭一牛乃叱而隔之
分命各啖之危磴千尋
拔竒花四季鮮鶴歸

懸圃少鳳下碧梧偏桃易炎涼熟茶推醉醒煎邙家蒙
棗栗俗骨爽援蟬谷語昇喬鳥陂開共蒂蓮落楓丹葉
舞新葺紫芽拳翠竹雕羌笛懸藤煮蜀賤白雲長掩映
流水別潺湲作賦前儒闕冲虛南國先省郎求牧看野
老葺齋眠潘郎中存實詩云雙旌牧清源吟看壺公翠
入歐陽矩先輩自刺史蘇君書求泉山之為
畫屏云壺公之高志陽之深夢魂所思寺立興衰創碑須一二鑄清吟思
却隱簪紱奈縈牽

和王舍人崔補闕題天王寺

郭內青山寺難論此崛竒白雲生院落流水下城池石
像雷霆啓江沙鼎鼐期嶽僧來坐夏秦客會題詩岡轉
泉根滑門升蘚級危紫微今日句黃絹昔年碑歇鶴松
低閣鳴蛩徑出籬粉垣千堵束金塔九層支啼鳥笙簧
韻開花錦繡姿清齋奔井邑玄髮剃熊羆極浦征帆小
平蕪落日遲風篁清却暑煙草綠無時信士三公作靈
蹤四絕推良遊如不宿明月擬何之

投翰長趙侍郎

禹門西面逐飄蓬，忽喜仙都得入蹤。
賈氏許頻趨季虎，荀家因敢謁頭龍。
手扶日月重輪起，數是乾坤正氣鍾。
五色筆驅神出沒，八花塼接帝從容。
詩酬御製風騷古，論似人情鼎鼐濃。
豈有地能先鳳掖，別無山更勝鰲峯。
攀鴻日淺魂飛越，為鯉年深勢唵喁。
澤國雨荒三徑草，秦關雪折一枝筇。
吹成暖景猶葭律，引上纖蘿在獄松。
願向明朝薦幽滯，免教號泣觸登庸。

廊時李相公

秦城擇日發征轅
齋戒來投節制尊
分虎名高初命相
攀龍迹下愧登門
夜聽謳詠銷塵夢
曉拜旌幢戰旅魂
華舍未開寧有礙
綵毫雖乏敢無言
生兼文武為人傑
出應乾坤靜帝閣
計吐六竒誰敢敵
學窮三畧不須論
功高馬卸黃金甲
臺迥賓懽白玉樽
九穗嘉禾垂綺陌
四時甘雨帶雕軒
推恩每覺東溟淺
吹律能令北陸暄
青草連沙無血濺
黃榆鏢塞有鶯翻
笙歌合沓春風郭
雞犬連延碧岫邨
遊子不緣貪獻賦
永依棠樹託蓬根

成名後呈同年

業詩攻賦薦鄉書二紀如鴻歷九衢待得至公搜草澤
如從平陸到蓬壺雖慙錦鯉成穿額忝獲驪龍不寐珠
蒙楚數疑休下泣師劉大喝已為盧人間灰管供紅杏
天上煙花應白榆一字連鑣巡甲族千般唱罰賞皇都
名推顏柳題金塔飲自燕秦索玉妹退媿單寒終預此
敢將恩嶽急斯須

投刑部裴郎中

兩榜驅牽別海涔
佗門不合覓知音
瞻恩雖隔雲雷賜
向主終知犬馬心
禮闈後人窺作鏡
廟堂前席待為霖
已齊日月懸千古
肯誤風塵使陸沉
拜首敢將誠吐血
蛻形唯待諾如金
愁聞南院看期到
恐被東牆舊恨侵
緇化衣空難抵雪
黑銷頭盡不勝簪
數行淚裏依投志
直比滄溟未是深

輦下寓題

對酒何曾醉
尋僧未覺閒
無人不惆悵
終日見南山

寄題崔校書郊舍

一片寒塘水尋常立鷺鷥主人貧愛客沽酒徃吟詩

秋思

碧嶂猿啼夜新秋雨霽天誰人愛明月露坐洞庭船

芳草

澤國多芳草年年長自春應從屈平後更苦不歸人

輦下書事

北闕新王業東城入羽書秋風滿林起誰道有鱸魚

入關言懷

背將蹤跡向京師
出在先春入後時
落日灞橋飛雪裏
已聞南院有看期

過長江

曾搜景象恐通神
地下還應有主人
若把長江比湘浦
離騷不合自靈均

題靈峯僧院

繫馬松間不忍歸
數巡香茗一枰棋
擬登絕頂留人宿

猶待滄溟月滿時

司馬長卿

一自梁園失意回無人知有拔天才漢宮不鑠陳皇后
誰肯量金買賦來

歸思

薊北風煙空漢月湘南雲水半蠻邊寒為旅鴈暖還去
秦越離家可十年

東林寺貫休上人篆隸題詩

師名自越徹秦中秦越難尋師所從墨跡兩般詩一首
香爐峯下似相逢

寓江州李使君

使君曾被蟬聲苦每見詞文即為愁况是楚江鴻到後
可堪西望發孤舟

遊南寓題

江山節被雪霜遺毒草過秋未擬衰天不當時命鄒衍
亦將寒律入南吹

和同年趙先輩觀文

玉兔輪中方是樹金鰲頂上別無山雖然回首見煙水
事主酬恩難便閒

出京別同年

一枝仙桂已攀援歸去煙濤浦口邨雖恨別離還有意
槐花黃日出青門

木芙蓉三首

黃鳥啼煙二月朝若教開即牡丹饒天嫵青帝恩光盛

留與秋風雪寂寥

卻假青腰女剪成綠羅囊綻綵霞
玉誰憐不及黃花菊
只遇陶潛便得名

須到露寒方有態為經霜裛稍無香
移根若在秦宮裏
多少佳人泣曉妝

九日

陽數重時陰數殘露濃風硬欲成寒
莫言黃菊花開晚
獨占樽前一日歡

夏州道中

隴鴈南飛河水流秦城千里忍回頭
征行渾與求名背
九月中旬往夏州

經慈州感謝郎中

金聲乃是古詩流况有池塘春草儔
莫遣宣城獨垂號
雲山彼此謝公遊

寓題

吳中煙水越中山莫把漁樵謾自寬
歸泛扁舟可容易

五湖高士是拋官

寄宋明府

北闕秋期南國身
重關煙月五溪雲
風蟬已有數聲急
賴在陶家柳下聞

靈均

莫問靈均昔日遊
江蘼春盡岸楓秋
至今此事何人雪
月照楚山湘水流

馬嵬

錦江晴碧劒鋒竒
合有千年降聖時
天意從來知幸蜀
不關胎禍自蛾眉

和陳先輩陪陸舍人春日遊曲江

劉超遊召郗詵陪
為憶池亭舊賞來
紅杏花旁見山色
詩成因觸鼓聲回

花

莫道顏色如渥丹
莫道馨香過菖蘭
東風吹綻還吹落
明日誰為今日看

卷簾

綠髮侍女手纖纖
新捧嫦娥出素蟾
衛玠官高難久立
莫辭雙卷水精簾

啓帳

得人憎定繡芙蓉
愛鏤嫦娥出月蹤
侍女莫嫌擡素手
撥開珠翠待相逢

去扇

城上風生蠟炬寒
錦帷開處露翔鸞
已知秦女昇仙態

休把圓輕隔牡丹

別後

夢裏相逢無後期
煙中解珮杳何之
虧蟾便是陳宮鏡
莫吐清光照別離

嚴陵釣臺

終向煙霞作野夫
一竿竹不換簪裾
直鉤猶逐熊羆起
獨是先生真釣魚

馬嵬二首

鐵馬嘶風一渡河
淚珠零便作驚波
鳴泉亦感上皇意
流下隴頭嗚咽多

龍腦移香鳳輦留
可能千古永悠悠
夜臺若使香魂在
應作煙花出隴頭

閏八月

無人不愛今年閏
月看中秋兩度圓
唯恐雨師風伯意
至時還奪上樓天

奉和翁文堯戲寄

掘蘭宮裏數名郎好是乘輅出帝鄉
兩度還家還未有別論光彩向冠裳

奉和文堯對庭前千葉石榴

一朵千英綻曉枝綵霞堪與別為期
移根若在芙蓉苑豈向當年有醒時

翁文堯以美疹暫滯令公大王益得異禮觀今日寵待之盛輒成一章

滋賦誠文侯李盛終求一襲錦衣難如何
兩度還州里

兼借鄉人更剽觀

林鄭在舉場日時曰
滋賦誠文中外相獎

贈友人

超達陶子性留琴不設弦
覓句朝忘食傾杯夜廢眠
愛月影為伴吟風聲自連
聽此鶯飛谷心懷迷遠川

御定全唐詩卷七百六

欽定四庫全書薈要卷一萬八千一百十二

其部

御定全唐詩卷七百七

殷文圭

宋時避諱
改殷為湯

殷文圭池州人居九華苦學所用墨池底為之穴唐末
詞場請託公行文圭與遊恭獨步場屋乾寧中及第為
裴樞宣諭判官後事楊行密終左千牛衛將軍詩一卷

八月十五夜

萬里無雲鏡九州最團圓夜是中秋滿衣冰彩拂不落

遍地水光凝欲流
華嶽影寒清露掌
海門風急白潮頭
因君照我丹心事
減得愁人一夕愁

省試夜投獻座主

闢開公道選時英
神鏡高懸墜百靈
混沌分來融閭氣
欖槍滅處炫文星
燭然蘭省三條白
山東龍門萬仞青
聖教中興周禮在
不勞干羽舞明庭

觀賀皇太子冊命

嗣冊儲皇帝命行
萬方臣妾躍歡聲
鸞旂再立星辰正

雉扇雙開日月明自有漢元爭翊戴不勞商皓定欵傾
春宮保傅皆周召致主何憂不太平

行朝早春侍師門宴西溪席上作

西溪水色淨於苔畫蠲橫風絳帳開弦筦旋飄蓬鳥去
公卿皆是藻宮來金鱗擲浪錢翻荇玉爵黏香雪泛梅
三榜生徒逾七十豈期龍坂納非才

賀同年第三人劉先輩賦辟命

甲門才子鼎科人拂地藍衫榜下新脫俗文章笑鸚鵡

凌雲頭角壓麒麟
金壺藉草溪亭晚
玉勒穿花野寺春
多媿受恩同闕里
不嫌師僻與顏貧

寄廣南劉僕射

戰國從今却尚文
品流才子作將軍
畫船清宴蠻溪雨
粉閣閒吟瘴嶠雲
暴客卸戈歸惠政
史官調筆待儒勳
漢儀一化南人後
牧馬無因更夜聞

題吳中陸龜蒙山齋

萬卷圖書千戶貴
十洲煙景四時和
花心露洗腥腥血

水面風披瑟瑟羅莊叟靜眠清夢水客兒芳意小詩多
天麟不觸人間網擬把公卿換得麼

經李翰林墓

詩中日月酒中仙平地雄飛上九天身謫蓬萊金籍外
寶裝方丈玉堂前虎靴醉索將軍脫鴻筆悲無令子傳
十字遺碑三尺墓只應吟客弔秋煙

鸚鵡

丹背如簧翠羽輕隨人呼物旋知名金籠夜黯山西夢

玉枕曉憎簾外聲
才子愛奇吟不足
美人憐爾繡初成
應緣是我邯鄲客
相顧咬咬別有情

邊將別

地角天涯倍苦辛
十年鉛槧未酬身
朱門泣別同鮫客
紫塞旅游隨鴈臣
漢將出師衝曉雪
胡兒奔馬撲征塵
行行獨止干戈域
毳帳望誰爲主人

江南秋日

水國由來稱道情
野人經此頓神清
一篷秋雨睡初起

半硯冷雲吟未成青笠漁兒筒釣沒蓑衣菱女畫橈輕
冰綃寫上江南景寄與金鬃馬長卿

題友人庭竹

叢篁蕭瑟拂清陰貴地栽成碧玉林盡待花開添鳳食
可憐風擊狀龍吟鈿竿離立霜文靜錦籜飄零粉節深
何事子猷偏寄賞此君心似古一作人心主

覽陸龜蒙舊集

先生文價沸三吳白雪千編酒一壺吟去星辰筆下動

醉來高華眼中無峭如謝檜虬蟠活清似緱山鳳路孤
身後獨遺封禪草何人尋得佐鴻圖

玉仙道中

尊鱸方美別吳江筆陣詩魔雨未降山勢北蟠龍偃蹇
泉聲東激玉瑤琤古陂狐兔穿蠻塚破寺荆榛擁佛幢
信馬冷吟迷路處隔溪煙雨吠村厖

趙侍郎看紅白牡丹因寄楊狀頭贊圖

遲開都為讓羣芳貴地栽成對玉堂紅豔裏煙疑欲語

素華映月只聞香翦裁偏得東風意淡薄似
如一作矜西
子妝雅稱花中為首冠年年長占斷春光

題湖州太學丘光庭博士幽居

舜軌堯文混九垓明堂宏構集良材江邊雲卧如龍穩
天外泥書遣鶴來五夜藥苗滋沆瀣四時花影蔭莓苔
草玄門似山中靜不是公卿到不開

初秋留別越中幕客

魂夢飄零落葉洲北轅南柂幾時休月中青桂漸看老

星畔白榆還報秋鶴禁有知須強進嵒峰無事莫相留
吳花越柳饒君醉直待功成始舉頭

送道者朝見後歸山

暫隨蒲帛謁金鑾蕭灑風儀傲漢官天馬難將朱索絆
海鼇寧覺碧濤寬松壇月作尊前伴竹篋書為教外歡
神鼎已乾龍虎伏一條真氣出雲端

贈戰將

綠沈槍利雪峰尖犀甲軍裝稱紫髯威懾萬人長凜凜

禮延羣客每謙謙陣前戰馬黃金勒架上兵書白玉籤
不為己為儒弟子好依門下學韜鈴

九華賀雨吟

陶公焦思念生靈變旱為豐合杳冥雷劈老松疑虎怒
雨衝陰洞覺龍腥萬畦香稻蓬葱綠九朶奇峰撲亞青
吟賀西成饒旅興散絲飛灑滿長亭

贈池州張太守

神珠無類玉無瑕七葉簪貂漢相家陣面奔星破犀象

筆頭飛電躍龍蛇絳幃夜坐窮三史紅旆春行到九華
只怕池人留不住別遷征鎮擁高牙

中秋自宛陵寄池陽太守

出山三見月如蜃蝶夢終宵遶戟枝旅客思歸鴻去日
賢侯行化子來時郡樓遐想劉琨嘯相閣方窺謝傅基
按部況聞秋稼熟馬前迎拜羨并兒

次韻九華杜先輩重陽寄投宛陵丞相

日下飛聲徹不毛酒醒時得廣離騷先生鬢為吟詩白

上相心因治國勞千乘信迴魚榼重九華秋迴鳳巢高
強酬小謝重陽句沙恨無金盡日淘

寄賀杜荀鶴及第

一戰平疇五字勞晝歸鄉去錦為袍大鵬出海翎猶濕
駿馬辭天氣正豪九子舊山增秀絕二南新格變風騷
由來稽古符公道平地丹梯甲乙高

春草碧色

細草含愁碧芊綿南浦濱萋萋如恨別冉冉共傷春踈

雨煙華潤斜陽細彩勻花黏繁鬪錦人藉軟勝茵淺映
宮池水輕遮輦路塵杜回如可結誓作報恩身

和友人送衡尚書赴池陽副車

淮王上將例分憂玉帳參承半列侯次第選材如創履
別離排宴向藏舟鷗鵬變化知難測龍蠖升沉各有由
躑蹠行牽金鉞重嬋娟立唱翠娥愁築頭勲業諧三陣
滿腹詩書究九流金海珠韜乘月讀肉芝牙茗撥雲收
赤鱗旆卷鷗汀晚青雀船橫鴈陣秋十字細波澄鏡面

九華殘雪露峰頭醉沈北海千尊酒吟上南荆百尺樓
況是昭明食魚郡不妨閒擲釣璜鉤

貽李南平

文圭為內翰時草司空李德
誠麻潤筆久不至為詩督之

紫殿西頭月欲斜曾草臨淮上相麻潤筆已曾經奏謝
更飛章句問張華

句

龍舒太守人中傑風韻堂中心似月

方輿
勝覽

衆口聲光


誇漢將築頭勲業佐淮王

賀池陽太守正
命唐詩紀事

御定全唐詩卷七百七

謹案卷七百五第十一頁後三行烏道龍湫悉行
後刊本龍訛瀧據別本改





總校官庶吉士臣張能照

校對官庶吉士臣許兆椿

校對官庶吉士臣翟槐

謄錄監生臣李息滋

謄錄舉人臣丁兆隆

財團
法人
佛陀
教育
基金
會
釋淨
空
敬贈